

四庫全書

集部

欽定四庫全書

集部  
古城集卷五

詳校官中書臣賈鉞

中書臣劉源溥覆勘

總校官進士臣

朱鈐

校對官編修臣

朱攸

謄錄監生臣

姜澍

欽定四庫全書

古城集卷五

明張吉撰

五言古

讀石齋先生送蘇內翰伯誠詩欲和不能別賦古  
體一章為贈

滄江雨初歇  
霽我西歸艇  
醉犯石翁詩  
長吟覺心醒  
起看西樵月光與  
秋空迥  
忽聽鸞鶴聲  
飛緣彩雲影  
望之

不可見倚棹空引領

送都憲閔公赴任南京大司寇

廟堂經大猶邊政惠專恣開府叅重臣稽謀古三事緬  
惟貞憲度百責固攸萃冰炭一滿懷談笑成猜忌撩蛇  
遭毒螫往躅吁可憐我公來何遲德量難窺覷呀然包  
衆荒滄海論深邃畢挾所弛張從容歸大義三年白羽  
扇妥帖當篋笥君王念蘇公邦禁更所寄錯落嶺海間  
口碑紛莫記作詩歌道傍庶徹觀風使

風泉閣

我愛項子居翬飛翔太虛清飈激幽澗四聽皆笙竽娛  
人靡昕夕萬鏡喧中寂洞然見真吾了了歸無極

遊寶蓮寺

宦情乖素抱人事困騷屑偶憶塵外踪逍遙此弭節寒  
僧薰迷徑日出烟霏滅衆竅罌缶繁羣峯劍鏗列狺狺  
竹間犬吠久聲欲絕端坐意有餘靜言心自悅高朋講  
黃唐俗累祛蠓蟻沿林趁瀟爽傍日怡暄熱積水紛有

禽喬松不知雪天清羣動息野曠游氛竭不蛻淖濯中  
何由驅蹇劣情真悲舊想景定痛前轍輕舉逐雲浮靚  
容輝并滌野芳寒更賒隨意堪采頽采之欲遺誰佳人  
在巖穴紅顏釣滄海風浪多湫洌冉冉薄暮年妍媸混  
區別臨風把蕭艾嘆息同銷歇

與王永錫廖敷錫同遊三洲巖

仙巖渺何許宛在碧岑間我來不憚遠鼓枻湘水灣亦  
有同舟客熒熒俱妙顏舍舟入巖際巖溜方潺潺探幽

動野癖窺罅訝天慳雲深隱白日薄寒侵蒨管時見空  
洞表悠悠鷺鶴還安知峽山裏吏隱非真閒芳筵湛清  
醑代舞秉長簡蒼壁多往躡躋陵忘險艱更聞有仙客  
煉形依此山去來騎蒼鹿飄忽難追攀我欲見此客敢  
辭捐珮環再拜問至訣永超生死關

舟中讀謝鳴治先生所作伊洛淵源續錄序文其  
間有曰自是以來猶有竊吾道之名以用於昏  
濁之世借儒者之言以蓋其佛老之真嗚呼先

生之言蓋有所指我知之矣然先生既引而不發愚亦安敢明言聊布短章以誦其志

吾道作配者陰陽與柔剛勲華昔繼作四海蒙休光鴻猷垂萬世象尼獨彰彰孟軻氏既沒欲濟嗟無航世儒味糟粕醉夢紛幾場墜緒竟莫尋千載空彷徨卓哉程夫子挺生伊洛傍遺經究終始鄒魯風再揚珍重紫陽翁肆力為尤強斯文舊正印截截歸大方奈何百歲下通途忽榛荒偽儒事粉飾周身襲逢章秉圭立朝廷那



惜正風亡低心拜二氏正邪一秕糠謝丈上蔡流指摘  
中膏肓舟中偶披閱雅志薄雲翔欲仗鏌鋣為君誅  
彼狂

新秋登飛來寺閣有懷祁致和

登登如來閣秋色淨如洗傾耳無餘聲幽泉鳴不已塵  
心笑刊落靜憩花樹底花開不在巔花落不在趾真空  
本無迹兒女浪悲喜恰恰枝上鶯忽添三兩聲思君不  
可見望望海雲生

蒙庵詩

周王自東遷龍虎爭啗噬萬國交鋒銛流血奔川逝皇  
天為低昂四海看軒輊強羸下峻玉駢首就烹殪是時  
智謀士舉策無遺秘投足重於山奮舌長如臂敗亡竟  
無救何貴稱材技掩卷忽長嗟揚湯難止沸士苟丁其  
間醫國抱宏志若復甘棄捐蒼生何所恃請焚諸方書  
拜領名菴意

遊勾漏洞

洞在北流相傳  
葛洪煉丹之處

涓涓丘中溜寂寂巖下燒  
崑扉敞今古叅錯垂萬竅  
往稽諸洞天浮世豈同調  
安知紅塵裏搜抉得雄峭  
涉江褰我裳昨喜望都嶠  
竒觀復今日叢冗奮孤嘯  
曾聞稚川翁皓首慕虛杪  
乞令此煉丹遺生脫悲弔  
我攜兩將軍深討逐羣爝  
石骨冷難噓寒潭深不釣  
空餘舊牀底尚有碧砂料  
一醉不願餘旋車逐殘照

會慶寺餞別吳獻臣赴順德令

山房閒靜久荒草過人頭  
我今持一尊送君東海遊  
東

海未云遠君情何悠悠結交結知己氣味貴相投丈夫  
較分量天地本同流羣兒弄騷墨開口笑伊周伊周亦  
何損末俗吁可憂昨得王戶曹戶部主事王鴻儒獻臣數稱之譽之不  
容休明當解纜去還憶此地不願言樹根本好向卑近  
求

葵菴詩

此葵公所植艷艷湧紅雲葵心知向日公心知奉君君  
恩無畔岸日色有朝昏若把葵心比公心深幾分

陽江館中

酒酣拂孤枕夜久風色定荒哉瀕洞聲似撼坤輿勁初  
驚我幽夢敗壁看破鏡再聽轉淒涼愀然憂思併黃徒  
既烹滅絕塞鈺鼓靜何地吹戰塵喧呼猶響應是時孟  
冬節木脫江流淨豈有殷其雷行空布春令得非洞庭  
樂音盪烟濤暝無乃上黨車轟輻千輛並我今困炎海  
何自入吾聽輾轉不可明朱欄聊起凭潮雞滿隣壁一  
笑寒空瑩

陽春館中

寂寥古春州環堞依列岫森嚴類卓錫妥帖如伏獸厲  
氣一滷渤亭午失清晝猛漢掩袂過肥男堪一瘦斂襟  
思往昨見說即眉皺孰知漂流人山谷幾輻輳見我騎  
馬來奔波擁先後相公請下馬聽我陳哀疚厥茅雖可  
誅厥壤雖可耨其如氛祲多一疾輒無救老妻委溝壑  
洒血空滿袖跳出鬼門關殘生幸脫漏哀哉胡不歸塞  
兔避蒐狩逆順多門途

東廣有逆差  
順差之別

誅求苦難售衆官

樹聲譽割剝戒遲後試用此情推造心何太繆

新興館中

憶昨歲庚戌提兵頓茲境鐵馬嘶長空踏斷雲雷頂

雲稠

思雷俱新興山名

長鯨肆誅翦折首投烹鼎仗劍指東隅氣吞

滄海猛笙歌集豐屋野店無宵警臨流濯長纓笑逐邀

嬉請空門力春者天地夸同永捲旗入蒼烟幽討期一

逞鵲驚藤子落鶴沒松烟迴脩坂絕遺跡寂寞春雲冷

沉檀蕪孤殿空遠百金鋌

鑄像也

即今三載餘飄忽須臾

頃壯士悲戰袍殘僧戀燈影百年一驚電流俗浪驅騁  
白日照我庭長吟醉還醒泰山與蟬翼輕重忘差等

登梧州玉皇閣

雙川發何許源遠難尋度宛入郡城南並持歸大壑桂  
林與象郡西望遙叅錯溟海環其東島夷兼附薄要衝  
扼兩廣機苦旋掌握中丞建羽旗元帥張油幕劇賊累  
猖獗笑談成犄角真分當宁憂豈直增鎖鑰兵家據形  
便國計專委託赫赫觀軍容淪胥喪河朔因循昧殷鑒



何日當改作非職敢抗言臨風凭高閣

吳獻臣邀飲梧州冰井寺因遊呂仙祠

吳侯好事者飲我漫泉亭漫郎不復作泉水空泠泠汲  
引資漱滌塵心嗟頓惺心惺覺超詣漸與上禪并客殮  
金光草千載遊青冥遺蹤堪一訪披草入雲汀

行臺種竹詩答林見素子

此君美多儀蒼玉何錯落竦立天地間盤據有根脚軒  
皇俾厥祖聽鳳鳴阿閣後貢三邦來神禹親採度亦惟

睿聖公文彩相照灼國士歌長風繁星動寥廓公徂日  
已遠道降日已薄典午三四兒營昏媚狂藥貞姿久污  
鱗盪滌待公作漾漾湖水東清陰散葵藿邦人困利涉  
恃此為大竿蜿蜒蟠中臯舒卷恣寬綽感嘆二儀中融  
風載銷鑠盍作吹參差廣庭諧舜樂

桂林

古桂叢生處巖城畫角秋嵐烟鑠膚骨仗劍倦登遊旱  
甚米價踴一飽愧易謀所忻寇盜寧稍見瘡痍瘳夜半

宿僧閣露冷風颼攬衣起彷徨一水當檻流琮瑀觸  
鳴玉靜聽聲轉幽憶昨隘世網江湖紛百憂孤吟對寥  
廓四顧更添愁有客聽我吟問我竹扉頭燕歌類慷慨  
楚聲多怨尤非燕亦非楚胡然今夕謳謝客掩扉臥烈  
軒撼重樓天明起飯客別客下全州

望嶽

湘水澹寒波幽懷任孤艇迢迢望衡嶽堅坐移光景中  
天跨遙岑弭節諸曜騁薄海鬻威靈全荆破聲影壯哉

七十峯豈即非仙境氣侔鶉火烈功配炎曦炳圭壁走  
皇王乾坤一何永我行尚峯陰我志超絕頂雲深石道  
險嘆息空引領

易菴詩

艱哉念大難者空颯輕翰易易真容易曳踵旋平地抑  
有易而難請舒眉睫觀亦復難而易渾河寸膠利難易  
固多門衆議久喧喧君今據其易諸難無足論惑我方  
在茲再拜叩靈龜一雨復一霽何以決我疑委心坐清

夜江月冷相隨對影忽兩忘茫然歌此詩

次韻桑民懌和晦菴先生讀道書

地幽人自罕境寂心轉虛移牀傍松影卧看黃老書一  
息噓吸間氤氲妙無餘孤雲共來往豈復形迹拘穠纖  
多異患澹泊有真娛縹緲空中鶴一舉當何如

曹騰慊春睡恍惚夢滄洲嫋嫋吹玉笙安期羨門流十  
方藏粟粒千歲為春秋厭見風埃裏談諧方謬悠

迢迢崆峒客侈袂飄寒涼寶氣驗黃白玉英屑玄蒼出

入馭鸞鶴俄頃周八方安知有奇占得朋湘水鄉

曾聞穉川翁辛苦了玄道遠遊燄飛龍端居歇芳草允  
矣周三光後天長不老我欲問至訣孤琴候秋杪

金丹浴何處仙掌露清淒一粒試雞犬便與丹霄期亭  
亭瑤臺月千古照妍姿得一廉銷毀了了不容思

衰周漆園吏去矣不復還放浪多寓言流落天地間妖  
姬惜玄鬢蕩子悲顏顏杯酒際埋地朗吟對雲山

讀王黃門所贈詩有感而作效子美贈蘇渙體

皎皎白面郎三年騎介馬磨刀厚石裂縱咎蒼逕緒猛  
虎忍孤豚前卻難即舍疚心痛殘喘獨宿在霜野孤燭  
耀黃埃腥然一寒炮誓捐螻蟻軀奉答主恩者籌略畢  
敷舒變更賴陶冶飄飄金石聲偶墜轅門下一唱散鬼  
魅三軍悉樽筓却怪高將軍敢嗔文墨假

與原善話舊

天寒羣壑幽客散四壁靜躋攀肯堂餘捕逐而翁影汨  
汨伊閩波沿流固知迴王明梗時福辛苦嘆脩井土苴

把餘罄金珠猶厭秉可堪淚交墮不見論思永先生舊  
錐囊舉世看脫穎虓虎困耽耽三年惡聲屏古來設機  
穽天視高自炳變故等凍炎其如我心整至今髮如漆  
遐轂念方騁

弋陽贈鄭夢齡

二儀森萬有錯雜難比同窮通與得喪孰匪真宰功達  
人會其理委志順鴻濛我昨坐狂悖苦詞騰上穹幸寬  
鉄鎗咸甘逐夷焚風察卒事驅追嚴程敢從容朝命知



謂何禍恐不測中親朋斷踪跡音貺亦罕通我公獨無  
畏勗我全始終別筵炳明燭高談動簾櫳衆口陳利害  
哆然競西東公曰是有命心安貌怡融忽忽十三載蠻  
花看屢紅公當方面寄勲業何崇崇疾驅無後先獨復  
乖崖翁寵光耀川蜀金空亘長虹北風振霜葉槭槭墮  
我篷一繫拜公畢撫心載忡忡念昔執別初那卜今再  
逢離合固前定多計詎為工

敝帚篇

敝帚復敝帚形模真老醜短如瘿人軀髡如季孫首瓦  
礫笑摧殘髑髏嘲腐朽南箕舌尚在奈隔屈伸肘憶昨  
谿谷間丰茸迷左右嘉卉作芳隣庭柯為直友歲年徒  
冉冉寂寞甘自守主人偶甄收束縛聯八九提攜入門  
庭光彩射鐙白張樂娛大賓椎牛祝黃耆匪予莫先發  
次第及登卣每闕曜靈昇徂寅方絕丑主人髮未櫛顧  
我已入手穉子亦何知含飴狎雞狗百責都未遑我柄  
必首授如論豁畧功豈落他人後蕭條轉衰謝拋擲惟

引咎况免畀焚流主恩猶默受動靜固常理敢騰咨望  
口孤逸快新休衆勞悲舊垢日月我明燭雲霞我虛牖  
高卧動百年頽然不知久古今一驚電鏗耳何必壽人  
棄天所憐身單道彌厚寄謝千金資吾於爾何有

開建館中俟客

天風振庭柯槭槭徹孤館公餘偶閒坐紅葉飄來滿茗  
飲意所便寒涼怯冰盃一杯堪自慰幽獨懽懷短遲爾  
共佳期青袍休款款

度嶺

此峯界夷漢，蜿蟺薄層空。闊河既隔絕，風氣迴難同。織  
絺賓大蜡，寒澗飲長虹。古來遭譴斥，歷歷竄其中。聖世  
肆陶冶，瘴烟斂冥濛。逐客此量移，恩私荷優容。孤愚亦  
何幸，轍迹許遙通。結駟發中夕，登軀凌太穹。平看半規  
月，黯澹生天東。本候清涼至，返遭暄暖烘。乾坤有常理，  
人力詎為工。俯首省愆惡，越難號曉風。

晚宿石螺灘

輕橈泛清壑晚泊此溪曲倚棹試徘徊悠然忘拘束微  
烟藹林外慘澹見脩竹寂寂深巷紆森森芳園簇樹杪  
花落多隨風點茅屋言翁勿輕掃留我還來宿

閒居雜興

秋高天氣肅庭院游氛少端坐面晴峯興超乾坤表素  
心愛幽僻久被朱墨擾偶此息煩緣忘言玩昏窈風來  
花影亂吏散人聲悄曖曖松下雲油油烟際鳥物情各  
有適茲意誰能了

郡舍清且幽，閉門掩秋色。芙蓉嬌可掇，瓜瓞繁堪摘。異物非所飲，無求亦無獲。焚香味道腴，隱几覘鼻白。嘯罷山谷駭，豪來天壤窄。至理諒不違，於心良有得。如何市朝士，衣馬夸榮澤。

和王司諫見寄遊飛來寺用東坡韻

衆竅韻秋壑，孤禪怡冷灣。俄然下仙侶，鶴背頰玉顏。緜嶺吹笙者，一去久未還。安知不即此，引袂拂天關。冉冉香醞地，浮浮雲繪山。羗軀已物表，高唱百年間。醞雞發

吾覆業欲捐珮環伏枕憶孤峭撐空擁翠鬟

挹翠軒

朝來桃李花莫殞東流水艷色難久居金石無銷毀幽  
軒事高卧對景忘悲喜涵泳千古心蕩搖空翠裏

曲阜謁孔廟

三才本參列人道鎮無虧克肖二儀者茫茫知為誰帝  
業至勲華中天揚皎曦寂寞千載後空有高名垂孤堅  
更無極卓彼象尼師俯仰均覆載試占諸乳兒乳猶在

兒口渾渾亦何知所喻夫子聖天與地高卑古今同一  
轍不假教詔為逮自立門戶或操爐與錘孰云不師孔  
克自樹良規我年涉衰邁稍復念兒時徒興望洋嘆奈  
此鬢成絲靜念熱衷腸拮据殆忘疲宦轍指東魯周遊  
洙泗涯升堂肅瞻拜懍懍無邪思願言保終始努力復  
奚疑聖軌固云遠躋攀方自茲

瞻嶽

舊稔岱宗名今躡岱宗巘浮空物蒼翠巧笑神工淺併



倨東龍蹻萬古誰能遣  
天門與日觀登造即仙選  
終日揚棧車何由翼芳蘚  
山雲獨相識細傍我舒卷  
遥拜碧雲君許我自裁剪  
居為我衾枕行為我輿冕  
我願本易求仙凡那可辨

泰安州拜嶽

在天有北斗在地有岱宗  
主當造化窟生氣亘春冬  
古今秩祀典鼎列三公  
饗雲車走羣后檢玉競  
登封議禮猶引經聽者  
為改容矧茲一卷石偶  
號玉女峯豈有姁

娜姿默需非正供駿奔靡虛日衰疾亦與筇偃僂擁道  
周密雲朝不濃破產貢金璞殺身備奴傭羣愚固難喻  
軒冕何憧憧下視宗神祠寂寥空萬松黃冠僅數輩擊  
鼓兼撞鐘虺蛇本陰類影響踰神龍當有壯士奮枝劔  
矢相從睽茲冷熱態念彼顛倒蹤習見既積久誰復芥  
蒂胸我行已窈窕我拜已虔恭仰視不敢道戚戚哀魚  
喁引滿輒醉卧草花藉織襪

登巾子山作

聖孝侔天地勤劬懷母后母后既以徂推恩篤元舅窮  
陬事搜訪溫詔隕南斗恨彼狡獪兒令人眩多口墓門  
九頓首豈實汾陽後拜官擬殊勲寵賚無比偶古藏隲  
石獸夔制照羣醜薦蘿施椒房非道竟何有傍窺况奸  
細舉箭推轂穀繆訴渠有孚安知不盈缶聖心懼猶未  
詔歷詢耆耆英英臺諫姿微服力奔走嗟我何為者敢  
愛勤腓肘崎嶇榛莽間一嘯旋馬首

慕萱詩為侍御陳秉衡題

兒有寸草心搖蕩春風裏春風有時歇兒心悲不已君  
看湘水頭有魚不可鈎物情避哀怨無復問沉浮

空夫詩為行人余希周作

齋居黜筐篋深炳元化先羣動紛盪摩妙處依然頑  
跌憎色相迷惑不可遷長揖謝空夫諸有勿輕捐夫言  
空乃有固我上乘禪火空炫明彩鑑空察媿妍陽侯抱  
一空今古納奔川達觀理斯得公執無太偏再拜答空  
夫授我醢雞篇枵腹卧松月萬壑皆琴絃

曲江謁張文獻公祠

玄穹覆仙李奕奕耀靈葩鸚鵡啄其根瓊芬猶載嘉路  
車潛死士太清隕妖墓炎精散暘谷九有熙春霞懸揣  
浴日功如公能幾家寵光愧深墨直辭終國華薄暮移  
衆陰江湖空嘆嗟枯稊逐惡湍飄泊天之涯泉原一瞠  
目萬國風中花挺挺諫諍姿辛苦罕悠遐鄒人述孔業  
家法允無差三覲邦君既一言終莫加此意固淵永沉  
思盱遠沙

遊風洞寺

驅車破蒼烟飛壑見此洞絕頂入清寒凡軀斷登跏趺  
然啟今古青壁色飛動一逕徹丹崖殘碑得捫弄凌虛  
有高閣遠目聊一送秋色淡江天跳出幾雲夢錯落解  
金魚鏗錚鳴鉄鳳慘澹一老僧無言守虛甕捧觴隨地  
主偶爾逐吟哢嶺南雖高秋殘暑敵夏仲名區更幽賞  
締綵堪一諷志適形乃忘真能變炎凍安得登吾民于  
于免哀痛

雞臆績學圖為李少叅賦

公昔妙齡時遠心何迤演屏除聲利習沈浸諸經典聖  
軌載周旋天機泳深淺茅齋敞虛牖晝靜湘簾捲微風  
吹落花凌亂點蒼蘚四聽轉寂寞萬慮都消遣獨遺  
啞聲長短傍幽顯只今三十年驅轂吁蹇蹇披圖忽高  
唱俯仰情已緬拂拭舊牕檣塵編聊自展

畫鳳為成都貳守蒼梧吳獻臣題

求珠適合浦採玉趨于闕岳瀆氣所鍾精華無比肩我

昨求駿馬浪遊鴈蕩堦千金散已盡鼓柁旋舊川舉錯  
迷向往休誇心力堅邇來握郡符容與蒼梧顛陳芳固  
仍在葦葦萋萋然對之憶威鳳三年廢飡眠九苞忽在  
眼嗟爾親遠傳爾飢念竹實爾渴思醴泉何當銜瑞圖  
飛墜玉樓前靈龜不出積已卜道平平

蒼梧十景次汪憲副韻

冰井寒泉

漫郎不可作遺跡此陳井敞甕棄道傍閱彼真源冷番



番水東老洗心心已醒一掬漑後夫冷然動深省

葉天官盛

號水東井  
其再澹

### 火山劍氣

龍光萬丈餘畢竟歸良冶固知橐籥功分寸不可假

睽晦朔間望舒宜在野我心如可照何似垂鈎者

舊有  
守梧

者公暇  
釣魚

### 漾月清亭

一鏡了秋毫孤亭聊共倚浮榮等泡沫浪漫流光裏素

襪揚玉塵悠然踏清泚風波渺難見澹澹安汝止

繫龍孤洲

茫茫天壤間物物因維繫聊以永今朝安得號神異神龍誰繫之可繫非龍類山鬼拜我前公言本高致

西嶺嚴關

羣醜怯窺覷險巖仗茲嶺防關卓孤劔魅魍悉潛屏客舫載鐵衣江津苦猶梗安得置坦途寸寸皆佳境

北城新井

盜泉不可飲，井滌敢辭遠。  
一脈許剖分，伐竹躬百本。  
剖豈不勞，潔污懼淆混。  
酌以濯我纓，匪圖餽一飯。

呂亭仙跡

我從百粵來，蒼梧訪陳迹。  
豈復剝琢聲，空餘舊枰石。  
唐運垂三百，高風比仙客。  
冉冉埃壒中，何由一相識。

桂渚虹橋

病涉日萬夫，奔川莽牢落。  
遙空亘脩竦，衆目豎倚托。  
忽墮水中央，為功一何博。  
小狐今畢濟，真贗聊可略。

石岡飛鶴

胎仙下天來息此雲深處清夜聞玉笙凌風更飛去我  
曾凭高閣凝睇緜山樹被鷦巢故枝年餘幾何歲

丙穴嘉魚

湘川餘幾波灩灩蕩文苻固非沔南派有穴曷名丙腴  
鮮噓浪花射鮒笑寒井酣歌亂宵雅蜡臘吁不冷

抑齋詩

猛士當用怯睿夫須守愚卑卑固難踰皎皎終易污物

情多倚伏天道有盈虛達人會其理厭豐而喜臞聲華  
屏觀美神明希內腴韓彭赴菹醢千古一長吁君看齋  
中客平平躋坦途清風來竹牖明月在蓬廬長歌發金  
石此樂復何如

謁桂林舜廟

荒哉帝舜祠遠薄虞山下峭石轟垣墉香風襲蘭麝姜  
侯攜我至八桂清秋暇秋色傷客心往事轉驚訝有洞  
不聞韶南薰自臺榭是時蒼梧野荒僻堪夢怕崩殞固

莫詳廟享配禋蜡人心本至公萬古泣遺化祖龍死沙  
丘泯泯如長夜豈徒血食廢恨不躬唾罵善惡久彌章  
有同日燒夏何哉三季主嗜醜忘啖炙再拜出廟門作  
詩聊慰藉

一葦軒詩

君本幽居士清風揚海濱杪秋一開卷颯沓動吾人臨  
流嘆河廣揭厲竟誰親安得軒中物昏暎橫要津

與周梁石同訪鎮遠道士不遇因觀梁石所註悟

真篇有懷而作贈梁石

東帶拜先生郡齋芳樹底渴心慰疇昔婉孌增色喜玉  
貌澤且溫霜鬢奮而理高詞軋金石勁氣叅碣砥為指  
烟水東微茫脩竹裏煉形有仙客頗遂虛玄旨挾我往  
訪之凌晨涉中沚客從清浪去雲竇扃不啓時見巖洞  
陰芳華耀桃李桃李亦何言忘言相對倚開樽不停手  
作書動盈紙試問還丹客長生古今幾君材匪庸流聲  
望滿遐邇願為吾道計茲事宜力砥

古風懷楊方震

我舟戢帆檣奏疾借雙槳盤旋下洄洑超忽凌潏潏  
驥方脫羈形神固蕭爽妻孥片雲外相見猶反掌斬恨  
拔長刀漁歡布新網清風入我懷涼氣快幽賞玉堂有  
歸客遙憶心養養明當劔水濱握手論昨往

德慶感懷

長流下蒼梧此地當關節駐兵過西賊首尾困橫決縱  
有桀鰲資難逃死鈇鉞昔人多遠謀戍甲豈虛設承平



日既久什伍坐分裂時見村落間殘狺猶草竊殺人無  
寧歲焚剝蠶犂缺不俟猖獗餘生靈已挫折馳書懇當  
道撫捕牽多說痛念心欲寒經過指頻嚙從來事姑息  
寇亂無休歇燭火堪燎原其機當早滅

戲贈劉少卿

歲首與君朝京相對閱月默無一言君罷官歸  
章丘歲莫再見色笑斐然因贈是詩

昨舉珊瑚鞭拂斷天衢雪視公顏貌苦對客多結舌今

擁毳裘深山風帽簷劣視公顏色好談塵揮不徹語默  
固有時含思迓寒熱放懷丘壑內畢竟無拘掣我夢敢  
告公雲深蕨茅桀

陽朔館中述懷

羣峯卓錫錐羅列太虛表飛鳶颺清晝錯認搶榆鳥我  
投公宇中新旭半扉曉蒼烟淡數抹漸放林廬小脫葉  
競颺颺漁舟紛縹緲差池幽討心迴與川雲杳瘡痕奈  
滿目敢獨念輕矯薄暮猶虎聲不風波沸沼何當布羅

網此物驅除了括我風月囊歸與春事杪

慰汪方伯失子

阿郎倦埃壒早起三鳥遊諸仙喜得朋乃翁悲未休一  
悲復一喜泯泯暗相投喜去悲不任悲徂喜綢繆翕張  
在俄頃俄頃白人頭不見古聖人視物等虛舟超然委  
欣戚獨與天為流問郎今幾齡剛浹二紀秋若把彭喬  
比脩促良不侔達人試大觀亦復何怨尤礪礪一電光  
敢望曦輪周各司天陽柄以慰下土求所求倘偏頗下

土為拙謀天人固一理  
悉此可消憂憂遣理益惇  
萬有一浮漚作詩寄遐悃  
莫協公意不川谷帶薄寒  
葉脫風颼颼

除夕泊舟釣臺

漉漉桐江水赴壑靡歸期  
蕩舟歲云莫偶泊水之湄  
上有古釣臺下有樛木枝  
披衣躡危蹬瞻禮子陵祠  
子陵不可見子陵道可師  
浩然抱江月皎潔巢父姿  
清風濯九有奚以勲業為  
侃侃鄒孟氏論道宗宣尼  
聖之清與

任屈指尹及夷寂寞千載後遐蹤誰克嗣先生與孔明  
作配端不虧屣脫浮榮日鼎分危險時驅車值夷尹傾  
蓋復奚疑白鳳與青鸞曠世互來儀孟氏不可作孤吟  
聊自知

萍實橋

緼哉春秋時萬事俱錯忤血國哀二十僭橫覲荆楚稱  
尊偪周室餘制無復數聖軌倏南轅天覆嗟何溥昭王  
苟領會變革寧小補蹇蹇東周心或在江漢許霸功梗

王業賤斥等廝虜大義垂遺經雅哇正千古胡能捐素  
抱迴幹隨世主設有萍實祥兆伊霸中土陽舒復陰慘  
焉測天肺腑升木教阿捺厚誣我尼父脂流萬人口孰  
與味甘苦溪水媚曉暉江雲逗秋浦矢詩破浮偽雲水  
相爾汝

攄憤詩答毛雲牕見寄

含章肇坤美君子恥虛譽牢吾劄脚跟須在超然處庭  
柯開山鳥啞啞類含怒孔翠心赤霄何曾少回顧破斧

臧撐犁寧論蠻獠懼世情任翻覆天鑒自昭著不見象  
尼翁靡裘騰毀惡引經折蘇暴讒諧皆邪慮

新城對雪有感

南人見北雪怪雪異南北南雪醞釀初凍色物區域形

穹

南欲雪則天黃

集厚陣鐵騎攻不克萬瓦鈿有聲蒼珠集如

織羣兒競歡笑仰盼情何極得雪投母懷瑤華詫胸臆  
朔北豈固然筮雪剛弛劫輕雲逗晴漢布合全未力雪  
片遽顛翻擾案渚楮墨閉門養堅素衆竅病難塞憶昨

朝京師披雪方退食先聲枉諦聽適鼓多年感歲晏雪  
行署再見詎容默熱覘頻卓穎深念仍屏息寒日澹暉  
暉已照孤吟色天道嗟靡常人情尤叵測掃除等殘雪  
皓首崇明德

遊靈寶觀

晚涼蕩輕舟容與落桑渚如聞雞犬聲層觀望何許捫  
蘿歷太陰洞名近觀身世疑輕舉足跡滿寰區勝遊欣載始

題石鼓書院因寄衡州鄧少府



往讀韓公詩還憶合江勝今登合江浦事事得稽證時  
雖秋氣高崖菊開未竟蒸水斷橋隳湘流碧苔淨亭暄  
日方午葉戰風初勁仰止石鼓祠清宮妥先聖捫蘿躋  
窈冥一逕轉深徭諸賢肅遺像再拜起深敬庶見退之  
翁峩冠面中正南軒子朱子左右相輝映勝事舞旄倪  
大烹繁餼飭靈暉燭幽顯艷艷開新鏡夷考武侯初爰  
居賦邦政中更二季手風氣日以盛三子微一夫茲院  
何由競緬懷俱泯泯揆理殊未稱先生古良吏惻惻心

所病早晚盍經營儀章須考訂重來應不厭更發登臨  
興

石鐘

我聞石鐘名久欲究其實疾風乖所願舟楫不遑息希  
聲恨未聆至理欣少測一氣分二儀萬形羅九域有常  
斯有變變假陽之力石本少陽精其變安可極若破介  
夫膽鏡徹佳人飾殞宋經特書浮泗貢專職石鐘蓋此  
類奚怪音可擊更恐多有之埋没人未識

送李伯起歸河南

伯起名興河南嵩縣人前監察御史謫戍南丹

遇革放歸

江雨淡霏霏解維送君去寒波盪人影好醜猶可茹鐵  
面雖少癯鐵心無改慮鬼神事窺闕固已謀默助我欲  
勸加餐持贈枕椰箸

乘便寧親詩為鄒黃門賦

茫茫天地心要眇難窺闕一般地中雷剗然如弛禁高

堂燦星帔殊渥浩春浸節撫衣襜初兒當敢言任念兒  
忽在眼繫馬抓梅蔭跪拜讀璽書歡聲動擊紵羨餘無  
所獻慈旨深引飲嶺表雪如金俄驚破氛侵

鄒既踰嶺  
偶值大雪

七言古

遊都嶠巖

往年耽翫諸仙籙知有洞天三十六蠲心滌念斷鹽醢  
願躡仙蹤尋壑谷自裂玄襟投世網紛吾泐忍隨標榜  
鈎簾秋月映珊瑚擲筆春雷驅魍魎酒闌擊節忽悲歌

舊癖難將藥石磨白沙已試勾漏火紆轡仍從都嶠過  
都嶠雲深山鬼惡探幽不復然疑作僧噓茶鼎石牀溫  
鳥啄松陰藤子落艷艷桃花夾岸開煖風點染無氛埃  
心知不是桃源路那得神仙接引來桃源路迷終荒忽  
亦笑漁翁無長物何如此境真絕竒白石粼粼山曲埒  
古檀一炷清客心峭壁千尋擎佛骨前旌已抗馬首東  
一望孤撐猶突兀兀千峯萬壑嗟蕪沒

徐州觀壽王之國

溪風獵獵吹旗畫百丈游龍齊上下天東清旭散金鋪  
帝子樓舫枕臺榭三軍鎧仗侔霜雪天策親軍此其亞  
偃王僭號朝諸侯逆節至今堪唾罵匹夫扛鼎又何取  
照耀彭城訝伊乍我昨路遠江都亭風帆夜踔淮海星  
已見先舟列千炬萬夫合杳呼寒汀今見王舟更驚汗  
舳艫千里猶未斷始信炎劉梁孝王東都宮殿凌霄漢  
垂衣聖主覃深仁十年穹昊無先春窮髮猶知蒙帝力  
矧茲介弟同氣親金滕溫制垂千裔寶藏崇資兼百珍

親親自昔先封建帶礪河山示深眷帝曰於乎小子封  
越茲西土汝惟殿一來一往自佳政况抱區區臣子願  
願言永鑑蒼東平作殿無如力為善

次徐大行許由棄瓢韻

都君已為蒼生出慘斷春花與秋月天遺一叟治幽憂  
萬里冥鴻托消息潁人莫笑螭與蝦盪泊烟濤為室家  
天真自適更何事亦笑乾坤生有涯青山對我寂無語  
爾瓢何乃聲如許臨流送爾出人間好去當筵侑歌舞

重經浯溪

我舟再楫三吾道李家陳迹悲如掃兩翁辭翰猶依然  
十丈鐵崖懸至寶土花漬蝕茫穗半猶照清湘舞寒藻  
西風古樹泣露高似泣中興多潦草徒令過客張羣議  
角立俄然費探討有執儲皇職撫軍亟尸天位乃無君  
有言彼為社稷計不立危亡當即至耄荒久失率土心  
那更作人懷敵愾我求二說恐未然義雖有據道終偏  
無君豈可君天下坐視危亡亦背天當時諸臣在靈武



只合合謀操兩疏一祈禪詔降金天一請嗣皇膺歷數  
艱難百計萃厥躬舐犢老牛宜內顧但少須臾俟報章  
正名討賊寧憂莫艱侯歸國惜太晚鴻漸諸人誰曉悟  
遂令河北數十州欲覩天日終無路山水三吾素有靈  
高歌夜半請深聆

謁諸葛武侯廟

炎精欲墮仍餘煜敢冀瞻烏止誰屋不聞詩紀黍離初  
蕞爾東周已無祿春秋予奪嚴鈇袞隻字何曾假臣僕

威靈不君四海沸龍種翩然躍潛服天猶祚漢卓難誣  
神鼎窺觚罪當族二荀周陸號英俊却與孫曹作心腹  
君親大義竟茫然縱有微長烏足錄惟公志在安劉氏  
玄德那知不文叔配天繼統旋舊都不屬公躬更誰屬  
假遭僭偽雖百顧堅卧惟應老空谷勲名事業等游氛  
萬古誰明此衷曲紫陽特筆二三策昭烈高光胥瞑目  
古廟崢嶸八桂陰花間拜謁香滿襟筆誅陳壽恨不早  
誤彼溫公帝魏心

遊七星巖

斗光融融石光爛萬古乾坤同一貫我舟西艤禪寺陰  
艮峯垂輝遠相伴含景蒼精久捐棄慚愧紅塵此軀幹  
使君招我趁幽尋翠壁黃緣出霄漢雲深對面輒相失  
一往一來嗟浪漫黃冠霧裏跪焚香白叟峯陰執躬爨  
十洲三島知何在侈袂誤同仙侶看酒酣身世欲都忘  
豈有儻來縈計算獨祝東風作惡遲及花更卜延清翫

陵縣謁顏魯公祠

纖柔數撚春衣薄慘澹風埃紛作惡孤城道是古平原  
感慨興懷涕橫落祿山逆節初萌動呀然銳氣吞河朔  
賴公兄弟舉義旗始畏諸豪謀掎角兩京逮沒胡雛手  
識者固知非賊有謂應北顧雄武城恐有如公議其後  
兵非牽制敵不亡沛公滅楚資彭郎公功豈在李郭下  
成敗休論孰短長輸金委璧馴虎狼莫知何狀乃麟鳳  
兼陳辭旨悼耄荒陰霾蔽日魂慘傷嗚呼殷鑒那可忘

經嚴子陵釣臺

炎光翳翳中微日白水潛龍已形質直須暗結知名人  
豪傑如公固其一驅馳戎馬數年間寇鄧耿賈皆風翰  
冥鴻杳杳知何處劉氏寧忘宜再安惟應風節饒孤峻  
恥事計謀并戰陣中興神器已有歸物色匪勤終不進  
舊知萬乘莫相疑富貴勲名我不知威鳳豈是籠中物  
萬里烟江一釣絲

示長山學諭南漢

長山古  
於陵也

漢厲志清苦特甚然賦詩有持已遠宗陳仲子

之句懼其勇於背孟終無歸宿作此示之

擇術須精守須正一入他蹊即迷竄於陵廉士古推先  
賴我鄒翁藥其病舊途狂客湖湘兒力稱仲子如君為  
行路茫茫眯雙目一施一嫫爭妍媸胸中繩墨宜深炳  
曲直千行俱整整摩娑斗酒老盱江醉殺少年猶不省  
寄別節齋王都憲撫治湖廣地方

湖湘漢沔吾隣藪萬艇千艘歲時走枯鱗秬粟動盈倉  
兒女遮羅開笑口公私仰給百餘年子孫父祖代流傳

比遭蝗旱痛連歲田不耕收澤不鮮遙憐餓殍僵中野  
怒吼豺狼猶不舍誅求移檄苦多門骨髓已乾憂莫寫  
撒手歸來對人說舌猶未掉心先折獨勞聖主念遺黎  
簡在貞臣頌節鉞虎口嬰兒念再生淨潔素抱今施設

和雙溪杭僉憲謁曹娥廟留題

水濱故事堪搜索宓妃枕也湘妃瑟茫茫真偽苦難分  
遊子相猜非一日蘭芎山下草露零孝女高風誰復覓  
雙旌冉冉導雙溪芳醕雅歌相繼出邯鄲古碑久磨滅

臨江土木空形質老瞞逆焰已熏天漢鼎多年泯馨餼  
碑陰隱字揣摩餘猶與徒人較踈密不思娥心憎天晁  
怒氣潛張己盈室娥生玄聖作經前直與共姬送書卒  
水火無情道本高千古越峯無嶂碎

西湖曲

西湖美麗聲吳楚湛湛澄波照今古紅亭隱霧閃蘋虬  
古木盤隄踞蒼虎大舟樓櫓擁深輦小艇榔橈疾飛羽  
春秋冬夏無虛日下土浮沉送歌舞倚風皓齒裊金音



傍水輕裾飄玉縷我來歌舞寂不聞狼籍盃盤僅三五  
酒酣指顧天欲暮泣斷栖霞一坏土憶昨牧馬吸海枯  
舉國惛惛走無所他時提兵頓梁宋不敢南窺豈無故  
徒以公軍襄漢間百萬驅貅怯東渡假令中原念已灰  
公功語及重堪哀坐看魚肉賊臣手偶被冠裳亦念哉  
嗚呼此水真鴆毒君父相關溺不回中興大計在定鼎  
舍旃天府奚規恢伯紀訐謀棄不用嗟公不死眉宇為

誰開

和李茂卿大理見寄

湘纍掩袂悲宗國白日無輝天改色幽辭幾曲緒愁心  
蘭茝千年馨九域諸家步驟必纍君一鶴千雞終不羣  
夜牕罷誦掩松月半榻齁齁夢楚雲疑纍不死猶聲響  
叩玉鏘金入吾掌孔鸞互集眩西東神鬼哀吟驚下上  
紛紛得喪已茫然古人孰與今人賢不扃破屋貧仍住  
折足方牀病且眠不願封醉鄉侯傲睨萬物意悠悠糟  
牀枕籍迷昏曉顛倒乾坤象罔流不願學海上翁南山

北斗繫其終飄然一舉超人世出入鞭霆與駕風得仙  
得酒詫臻此薄說江鄉貧病士大非貧病寧彼知色相  
聲音咸脫矣荷鋤日日獨出門遇饁相呼田父恩得詩  
輒引焚其稿心與長江泯泯論

舊壽鄭先生八旬辱為古體長篇投謝次韻奉答  
齋居端坐盱乾圓隱隱金聲墜我前焚香拜捧讀數過  
千花萬草增華鮮所貴論心不論面睽違浹世如驚電  
鳩藤八尺渺天涯最恨相思不相見埃濤蹙蹙秋復春

武非武兮文非文  
蠻烟瘴雨變鬢髮  
鐵馬金戈銷客魂  
翻思泮水怡春藻  
談笑東風杏花老  
操觚抱槩依斗山  
所業揆今何醜好  
半生睥睨眼力疲  
重累鈞石輕毫釐  
攫金抵壁同稱賞  
是詭堅冰作皎熙  
先生皓首眠滄海  
露芭雲苓扱衣采  
祥麟威鳳隱郊坰  
敢道虞皇得元凱  
樂山者壽固其常  
應肩鏗耳凋三光  
手提爐鞴業鑄我  
石爛江枯那可忘  
二郎養就冲霄翼  
暫引雙雛笑推激  
願崇令德諧我私  
萬里鴻逵看偉績  
老天自昔祐善人

豐其脗者嗇於身不見于王二公後勲聲烈烈耀嚴宸

李都閩同登蓬萊閣觀海

蒼髯如戟李將軍平生嗜好斯文行邊宛轉陰山北  
望水沉吟東海濱蓬萊暑雨開新霽半落滄潮含曉雲  
崔嵬閣道隳空濶導吾並蓋窮氤氲須臾雲散諸島出  
二竹三門聯甲乙寸心恍惚共神謀兩目顛頂與天畢  
却憶太始混沌初陰陽摩盪無形質二儀既闢清濁分  
洄瀾願中止天一外浮乾象內涵坤倒景神人難致詰

坤軒西北輕東南萬派奔趨同一律海市流傳不記秋  
古今勝事信無傳南多鮫室北蜃室變幻起滅難推求  
蜃為樓閣鮫為綃往往真與塵世侔雖侔塵世終莫有  
吁嗟入目不入手是時我與李將軍注目晴空頗良久  
渺然一碧何所見恍恍徒聞鼇抃蛟龍吼人言海烟映  
日海市乃露呈孰是神物無依憑空明萬象驚曠裊伸  
手誰探波底星

題劉世熙愛茶卷

世熙舊抱宿疾或教其啜茶而愈因有是號時  
領提舉司事開局臨清

陽羨山人骨不凡  
滄松絕粒棲翠巖  
愛君不惜致筐篚  
自詫仙家風味酣  
歸來畫省青春好  
落花細細兼幽草  
數甌啜罷蕭爽多  
漸覺沉痾去如掃  
赤箭青芝世所珍  
寧知此物妙通神  
神農本草偶遺畧  
欲著新經開我人  
一爐一鼎深相結  
水火中宵猶未滅  
興闌高枕神氣清  
片月孤梅幽夢切

送人還鄉

風吹細柳搖香陌  
行子蕭條出京國  
白駒皎皎蹴嚴程  
霧鬣馬鬃帶晚星  
粟薪瓜苦淹中野  
不見三年憂莫寫  
憂莫寫兮心自知  
欲寫憂兮須此時  
我亦欲歸歸未得  
送子歸心轉悽惻  
青袍白馬走天涯  
看到燕山幾度花  
丈夫自古輕離別  
豈是鞬鷹飽飛掣  
過盡長亭復短亭  
故園桃李飄香雪

金莖仙人辭漢歌



魏明帝詔官官牽車西取漢孝武捧露盤仙人  
欲立置殿前官官既拆盤仙人臨載乃潸然淚  
下唐李賀作歌哀之辭甚古健而義則未盡故  
復踵其韻而為之

燒金餌玉燕齊客霞表心情鬼蹤跡空中沉瀝期奉君  
十指金仙倚空碧青青草已繇千里阿奴更祝螟蛉子  
兩都文武遂成灰獨唸劉家舊山水東都却憶茂陵道  
恨不當初與俱老車輪未轉淚成河白日無光天宇小

望夫石

郎如流水去不歸  
妾身未死心先灰  
一朝粉黛隨烟霧  
郎歸空拜北邙堆  
辛勤累石明妾志  
數尺昂然妾無異  
貞堅莫道本無情  
淚痕血點皆生氣  
呀鷹暮啄膚辭癯  
十年山鬼空揶揄  
相公請禁樵採路  
不壞期與天地俱

續高州民謠

雲盧羣盜如羣虎  
終歲噬人紛莫數  
村村野哭沸寒空  
白骨連雲慘場圃  
生同虺蜴為巢穴  
性命纖微等埃土

闔門魚肉傷里隣苟活甘心作臣虜刀痕入骨尚流血  
對面堪聞不堪覩里胥持檄數相過督集殘創操破斧  
困倉焚蕩雞犬盡奈此公移日旁午去年官軍駐平定  
閃閃旌旗耀江潯將軍彈鋏坐笑談頗放殘臬恣翔舞  
今年元帥披金甲親解吾民倒懸苦閭閻猶恐踵前蹤  
忍使涸鱗遭數罟我本書生何所知夜闌揜袂風淒淒  
兩階干羽無消息月色驚看滿戍旗

梅花圖為舒方伯賦次周憲長韻

江妃捧出脫胎龍鱗甲參差動朔風天根一脈竇嚴冬  
已闖紅爐金鐵融晉楚非富顏非窮敢將腴菲論拙工  
依稀一覺羅浮夢萬紫千紅處處同

淮陰追次遜志先生韻先生之詩似咎高帝而恕  
信者予略反之各言其志而已

咸陽宮闕烟燼黃祖龍死後天地荒彩雲郁郁彌空長  
芒碭真人升廟堂將軍國士號無雙乳臭羣兒誰可當  
鼓行東北無分王舉手沐猴肝膽傷少年辱已鉅惠償

主恩如海吁敢忘惜哉天道不自量甘遂布越遺留良  
婦人毒手親觸撞舉族含冤沈鬼鄉功成身退真竒方  
嗚呼豈有生長無收藏

八桂傳香詩為李貳守賦

瑤臺夜靜冰蟾冷海色如銀秋耿耿金橋霜滑屨音遲  
大步健兒期一猛盈盈金粟吹香遠猶記淮南歌偃蹇  
吳家斧入李家門偃蹇樛枝經幾剪古稱伯達慈明輩  
謂萃一宗咸俊乂莫怨佳人絕代無渠今舉足堪追配

追壽武源潔尊翁七十詩

山西人

十年鼓枻湘南水堯舜遺墟望何許尚聞有客襲遺風  
擊壤高歌白雲裏我生好古恒苦心仗劍欲踏梁山岑  
鷓鴣却喜集南國兩翮天香清我襟郵亭碧草三垂井  
猶記徽言曾拜領元龜告我得長椿七十風光等俄頃  
門弧旭日喧歌吹縞衣不似褻衣永三年握筆不成章  
重與喬松說光景

送刑部主事陳德英赴任南都

憶曾首事陳恥庵玄霜紺雪咀寒甘繼事蒙庵在南國  
歎根九節席微酣我非二老幾乾沒業使凡軀有仙骨  
用師絕利枉勞形却笑陰符為長物每依海月望三山  
宛在虛無縹緲間或騎黃鶴去不返或擁衾枕相幽潺  
得朋偶在錢塘澣恥庵伯也蒙庵父吳歛楚舞避清歡  
笑煮龍團擘麟脯醒心知味憐絕少枕籍糟牀紛莫數  
手握靈龜入省初刺天羽翮看軒舞

梧州送土酋岑猛岑壑往討饒賊

權璫鼓臂撼太清九有崩騰如沸羹攫金白晝作歡笑  
餽養梟獍娛心情苞苴竿牘勢倒海布流成風誰解改  
潘郎猛心猛於虎萬事不知惟薦賄東郊惡少張赤髯  
欲取潘郎頭作醢橫行蹂踐一萬家曲眉卷髮死如麻  
跋跋赤子走不輟淚血雙滂殷土花失律誰驅烏合衆  
狂來跳入姚源洞三千性命等鴻毛快劍長鎗業齋送  
天寒歲暮霜雪暗浮世空悲一場夢汝提十萬橫磨甲  
桂海春波覺猶狹虺蛇積血腥鋒鋌蛟蜃殘骸物啞呷



且看鐵騎疾如風  
鼠怪狐妖捲地空  
宣尼慘淡居夷志  
霧釋冰消一嘯中

贈劉通府

昨跨蒼虬恣馳騁  
曉拂君山莫襄郢  
飄飄列子御風行  
出入有無凌倒影  
十郡宗藩聯戚畹  
尺步繩趨咸整整  
乳哺赤子如哺雛  
抑塞誅求杜干請  
干請誅求事慘傷  
犬羊盡化為豺狼  
仰天戟手祝來世  
有身只願生湖湘  
戚畹如君豈多見  
投我明珠閃驚電  
三年不食亦伸眉

語及民艱淚如綫

送彭憲副進表赴京

彭乃戴先生門下高弟嘗與予同入覲相別二  
年後會于浙

純皇豐芑賡歌日御史大夫

戴都憲

初改秩

時以御史陞陝西副使仍

提學入關多士動雲浮豪邁幾人親入室先生純孝舊聞

名蹴雪趨朝執轡情二年夢想空馳戀越水吳山偶相  
行一朝獨復朝天去延頸吾人觀赤幟經綸自捲還自

舒進退從容有餘地

王母太夫人七十壽詩

南京冢宰毗陵王公之配也

秋髯短脆那禁撚勝事高歌興非淺  
仙娥笑指海揚塵  
老手親繅如甕繭龍蟠鳳翥舊天珍  
照耀通家諸縉紳  
雲箋授我含冰雪惡札縱橫敢避嗔  
紫陽宮下空回首  
遯矣金盤一卮酒不辭百拜飛羣珍  
都下省郎方岳叟

伊親白少參段  
主政為求諸詩

登飛來寺示僧無名

山寺瀕江俯江岸遊人今古紛無算我是朝辭濛沿灣  
投宿空門夜剛半雞聲喔喔度寒流日出烟生曉凌亂  
着冠束帶躡苔磴道謁山僧來不緩初登凡骨疑可仙  
再登世態驚冰泮扶倦終登最上頭心知手可捫霄漢  
聲聲木末轟高唱脚脚雲頭檢清翫刻玉鋪金法相軀  
碧獅粉象真宗伴山僧煮茗供我畢肺腑清如挹霜潑  
聽話蕭梁奉佛年象教輝光尤煥爛不見江寧古佛宮  
飛來遠翥排空翰梅關一角今尚在來往行人得奇觀

德僧茗飲恥僧言  
掩面休辭赭面汗  
下來獨背松陰語  
看汲清灘事樵爨  
歎息山僧苦死迷  
流沙弱水何漫漈  
題故太保毗陵白公遺趾感物興懷卷

太保勲庸垂鼎銘  
黃鍾大呂一毛輕  
太保襟懷寄丘壑  
玉田珠樹相參錯  
丘壑靈風颯曉昏  
悠悠過客總啼痕  
他年學士把書卷  
還泣名臣白公傳

露筋烈女祠

佳人翠袂映幽竹  
風鬟霧鬢清如玉  
崎嶇一棹長淮曲

客子薄莫歌死鹿盍離毒噉即裊禡此身誓死不受辱  
天地黯黯鬼神哭羅襦錦帶深結束泉源斷絕貞心暴  
姓名不假青史錄柔弱在貌剛滿腹幽光萬古照祠木  
男兒忍使綱常覆過此不知何面目哀哉此輩真禽犢

望廬山作

彭蠡之濱大江滸羣山矗立森珪瓊獨有匡廬勢最高  
俯視一一如環堵匡廬之峯真絕竒青天割破愁神祇  
嶄巖百態應難狀鉅衍三軍勞並持我來正值秋氣改

濁浪翻空若浮海貪看漸覺眼花添欲上終疑筋力殆  
却怪玄圭奏功後歷紀諸峯此峯漏世儒雖辨敷淺源  
恐將附贅為膚媵嗟爾猶為神禹之所遺自餘幽眇何  
由知羣山羣山勿相疑此峯微爾誰能窺嗚呼此峯微  
爾誰能窺

登岳陽樓

巴陵縣前春水生古墻苔色鷓鴣聲主人錦蓋團空翠  
攜我岳陽樓上行樓上古像中衣淨純陽真人眠未醒

曾聞三醉作飛仙頗恨不經微考證明明孔道侔天日  
敢將伎倆清心性設有虛空鐵笛聲正宜掩耳防吾聽  
主人好懷靡休歇清醕白粲杯盤潔一眺平湖萬里寬  
澧蘭薄暮吹香切緣思帝子下青冥逍遙極浦聊弭節  
樹輪後馱山氣黑蓀壁椒堂愁苑結舉觴欲酌懼非誠  
願遺我珮捐余玦佩玦琮瑋路杳茫深烟密竹亂蒼黃  
歌鐘未撤憂思積凭樓一嘯楚天碧

遊桃川宮



板橋腐朽垂傾折瘦筇緩度心淒切仙家遠在碧岑間  
一犬寥寥山雨歇遙看遠樹立如齊上有陰崖下惡溪  
黃冠說是秦人洞路岐斷絕不可躋秦人種桃滿阡陌  
東風何事無顏色恐是漁郎一夢餘誤勞數輩迷津客

九日謾興

烏有先生著布袍軀長八尺膽氣豪翩然騎鶴歷九臯  
笑談霞表超蓬蒿驂麟翳鳳列仙曹不徐不亟帝所褒  
玉童婉孌鸞笙號月瓢冷浴紫金膏北斗杓星手所操

黃流倒瀉滄海濤安期巨棗金母桃攫而食之倅啗芼  
腰間琬琤金錯刀剗犀執象剗鯨鰲下瞰八極了莫逃  
秣糠掃蕩輕於毛懸車欹側赤焰韜先驅負弩旋旌旄  
下來兩腋風蕭颺君不聞龍井山頭萬株菊寒香盡入  
高人腹

贈溫推府鄉兄

江心微雨棹謳聲倚棹閒看春水生美人遙憶武陵郡  
戲挽桃梢綰醉纓白紵成衣羽成扇此日江亭卜相見

玉髯一別卽三霜嘆息流年若驚電君懷洒落與衆殊  
俯見寒潭秋月孤故人骨瘦舌猶在莫笑今吾非故吾

黃日昇東樓詩

太古神君眼如電悠悠下瞰迷方面鑿開混沌施赤輪  
捷旋萬古摩天健明星無明黯蒼茫仙山人世俱荒唐  
忽然碧海生金柱百怪屏迹羣魔藏先生握髮謀端倪  
非南非北還非西盤據青陽俯生氣焚楣斬出隳虹霓  
長風淡沲吹香陌桃葉蓁蓁自春色白雲無數宿簷端

長嘯一聲天地窄

送李文明員外出守岳州

春風吹空淨如掃使車緩轆東門草法垣秋月十年孤  
移向湖南照枯稿湖南山色雨斑斑鐵笛仙人還未還  
為道相思莫相及鷓鴣叫斷湘靈泣

古城集卷五